

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 13.9.2012 18.05 Uhr auf 94.0 bzw. 87,7

Leev Toehörers,

as ik bi herrelke Sömmerweer mit mien Auto bi 't Oostfreesland-Stadion lesd Sönndag ankwamm, stunnen up de Parkplatzen heel minn Autos. Dor was mi al klaar, dat weer neet völ Toekiekers in 't Stadion komen würren, um sük dat Spöl tüsken Kickers Emden und BW Hollage antoekieken. Un so was dat ok, blot ruugweg 235 Minsken wassen in 't Stadion. As ik mit **Bernhard Meyer**, Kickers- Ur-Lidd (Lidd = Mitglied), up de Tribüne dorover proot hebb, meenten wi, dat dat ok doran lag, dat an disse Dag mit 28 Grad toe heet was, un de Lü lever in hör Tunen bleven. Aber villicht ok, wall TuS Pesem (Pewsum) ok um Klock dree 'n Spöl in Huus harr. Woran dat nu liggt, dat so minn Toekiekers komen, sullten de, de de Verantwortenden bi Kickers Emden hebben, maal achterfragen.

Na dat Spöl, was ik mi mit Trainer **Yasin Turan** eenig, de meente, dat man Lehrgeld betahlt harr. So kwamm de Achtermannskupp bi de fell Konters van Hollage van een Verlegenheid in de anner. De grootste Fehler van Kickers was na mien Menen, dat man na de fell Tor in de 3. Menüte neet defensiv spölte, sünnern immer weer lang Ballen na vörn skoot. So 'n Spölwies is mit de Gefahr verbunnen, dat man de Ball neet up de egen Mann brengt, sünnern Konter van de Gegner inleiten deit. Hollage mook dat beter. De stunnen defensiv un sachen hör Kansen dann in heel fell vödragende Konter.

Dorna sach dat anfangs neet ut. **Thilko Boekhoff**, de na mien Menen 'n heel goed Spöl ofleverte, harr 'n Freetrapp ut ruugweg 25 Meter van de halvrechte Sied flach un skarp in de Straafruom skoten. Dor was **Ayaovi Bamezon** in de recht Moment toe Stee un kunn de Ball in 't Nett versenken.

Wat Kickers anfangs dorna spölte, kunn sük sehn laten. De Mannskupp harr stückofwat heel groot Torkansen. So vergaff **Martin Habben**, nettso as al lesd Week, in de 7. Menüte un in de 26. Menüte, na 'n moi Kombination mit **Tido Tuitjer**, de grote Kans för 'n wiedere Tor för Kickers Emden. Wenn een dorvan in 't Tor gahn was, was dat Spöl för Kickers Emden lopen, dorvan bün ik overtügt. Hollage blev in disse Tied dör Konter wall gefahrelk, man de Emders harren dat noch all in Greep. Aber de Mannskupp wull anskienend toevöl un verlor de „taktische Disziplin“, so as man seggt.

Een Ballverlust in de 37. Menüte van Kickers dreihete dann dat Spöl. Thilko Boekhoff harr de Ball un leep dormit mit hoog Tempo na vörn. He spölte in recht Ogenblick de Ball of, man dorbi truff he de Hand van een Spöler van Hollage. De Schiri harr na mien Menen Hand fleiten muss, worup ok all Kickersspöler wachten denen. Man he leet dat Spöl lopen. De Hollage Spölers reagerten an fellsten. Spölten de Ball na vörn. Twee moi Passspölen un **Mursel Smakolli** leet **Rene Carstens** in Kickers-Tor keen Kans. Boekhoff harr noch maal Pech, as he in de 54. Menüte 'n Granate an de Posten knallte.

Een Knackpunkt in 't Kickersspöl was ok, dat Schiri **Per-Ole Wendlandt** in de 41. Menüte 'n Elfer för Hollage gaff. In 'n Gewöhl was een Spöler van Hollage an Grund gahn. Ik löv neet, dat dat 'n Elfer was. Man de Schiri hett dat seker beter sehn. **Max Tolischus** leet sük de Kans neet nehmen un skoot dat tweed Tor för Hollage. Kickerstorwart Carstens meckerte un kreg dorför de geele Kaart.

In de 62. Menüte dann dat dart Tor för Hollage, weer dör 'n Konter. Dorvan hett Kickers sük neet mehr erhaalt. Se wull wall, man kunn neet mehr, un so full dat veerte Tor toe de Ennstand van 4:1 für Hollage.

Kickers hett, as al anfangs seggt, Lehrgeld betahlt. Ik hoop, dat in de komende Spölen weer betere Resultate rutkomen. Anfangen kann de Mannskupp dormit al komende Saterdag, wenn in Melle um halv veer dat Spöl anfleit word. Ik tipp up 2:0 för Kickers Emden

So, nu as alltied, ´n kört Foetballwitz:

De Mannskupp hett een Spöl na de anner verloren. De Trainer seggt toe sien Spölers: „An besten fangen wie noch maal heel van vörn an. Also: Dat hier is ´n Foetball.“

Dor kummt ´n Tüskenroep ut de lesde Rieg: „Kann ik dat Deel noch mal sehn???“

Leev Toehörers van Radio Oostfreesland,
dat was dat weer maal för disse Week,
ik hoop, Joe hett dat Plattdütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.
Bit anner Maal
Joe
Erich Bolinius
ut Emden-Petjem.